



利時神婆

塔羅測娛圈

數年前，占卜預測還是中國堪輿學的天下，八字、紫微斗數、鐵板神數、扶乩，都源自中國。不過，近年流行玩塔羅（姚安娜應記一功），單睇上樓cafe十居其九都有塔羅牌占卜就知幾乜啦！其實，在尖沙咀利時擺檔的「利時神婆」Gladys，比姚安娜仲要早出道，在行內頗知名，熟客極多。今次我哋特別請到Gladys幫手預測未來一年的娛樂圈狀況，睇睇西洋占卜又有幾準。



在尖沙咀擺檔六年的利時神婆Gladys，是全港第一個開塔羅占卜店的人。她八歲開始學玩塔羅牌，睇書自學，第一副塔羅牌是在書上剪下來的附送卡紙，估唔到邊學邊玩，就咁做埋專家。中學時個個搵佢占愛情，成為小塔羅師。

與玄結緣

大學畢業後第一份工是做玄學雜誌記者，點知做咗兩期就執笠。雖然只係好短時間，但亦發現好多讀者對塔羅牌深感興趣，經常收到大量來信，於是靈機一觸，與同事夾份開設一間占卜店。結果好受歡迎，每日都有人客慕名而來。

Gladys話，塔羅牌之所以受歡迎，因為夠簡單，是眾多占卜中最容易的。不過，好多人以為塔羅牌占卜只可以知結果，yes or

no，其實塔羅仲可以睇埋問題的前因後果，並建議一些可行的解決方法。

命運可變

試過有一次，有熟客在結婚前找她占卜，想知道這段婚姻會否美滿，點知出來的答案是負面的，夫妻會因財政問題鬧得不愉快。Gladys建議他們遲些結婚，但女方不願，於是，兩人將大搞婚禮的錢省下來，不到加勒比海舉行遊輪婚禮，不買樓，更約法三章不會為錢財嗌交。結果，男方真的在婚後不久遭裁員，幸好二人有所準備，現在仍然相處融洽。她說：「占卜雖然可以話你聽個答案，但命運係點樣，仍然好睇個人信念。只要你相信，命運仍可改變。」